



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

**Russell IPL asaya nungi anisüngzüker:
KKR nung shilem tasen agitsü**

**Ukraine ken o junga jembir, saka
ano mapa tali nüngdaker: Rubio**



VOL. XXIII ISSUE NO. 56 (ADOK 56)

DIMAPUR

SANGTENNÜ

(TUESDAY)

LUCHII

(DECEMBER) 02,

2025

₹ 5.00

ILP kübok Nepali/Gorkha nunger adener

Dimapur, December 1, 2025 (TYO): Nagaland nung Nepali/Gorkha nungerbo ILP nung madener ta bilemer saka ibaji aibelen tangatetba ka lir ta Naga Students' Federation (NSF) kübok Inner Line Regulation Commission (ILRC)-i jangjashitsüogo.

Nepali/Gorkha nunger India senso mesüra bendanger süang parnok Nagaland telungi aittsü mesüra alitsü atema Inner Line Permit (ILP) nüngdaker ta ILRC-i sangdong ka nung ashi.

Nagaland dena ILP-notified tesem ajak nung lisopur masür ajaki ILP nüngdaksü ta Bengal Eastern Frontier Regulation (BEFR), 1873 nung lateta lir. December 1963 nung Nagaland state mangudang arua alir non-indigenous persons dang iba

ozüing kübok madener ta ILRC-i nenshiogo.

Indo-Nepal Treaty of Peace and Friendship, 1950 ya Nepali nunger nem ILP exemption asüba ama meyipsar, ajisüaka iba treaty ajanga linük shia domestic laws kübok talidak, senzusenbongba aser shishilembaba atema dang lateta lir. Iba nung India nung Article 371(A) aser BEFR ozüingtem dena lir, ta parnokisa jangjashitsüogo.

Anungji public-i osang tai meprokshitsü aser Nepali sensotem ILP dak alia immigration laws talila nüngdaker ta ILRC-i metetdaksüogo.

ILP maparen shitak inyaka aotsü atema ILRC-i mapang shia tesem balala nung ajungben ILP mita aoba maparen inyaksü ta parnokisa shiogo.

Nagaland nung adult HIV prevalence rate onsara

Kohima, December 1, 2025 (TYO): Nagaland nung Adult HIV prevalence rate 1.37% lir aser iba ya India jenjang nung tanabuba lir, ta India HIV Estimates 2023 ajanga ashir.

World AIDS Day tenüing nung Commissioner & Secretary Health & Family Welfare, Nagaland aser Nagaland State AIDS Control Society (NSACS) chairman Anoop Khinchi-i Kisama nung NSACS Stall lapoktsüdang iba osang lemsatep.

"2030 nung SDG Goal 3 Target 3.3 atongtsü aser HIV/AIDS ya public health khuret ka masütsü atema linük nung state ajungai UNAIDS 95:95:95 Initiative atema inyaker" ta pai ashi.

"October 2025 tashi nung Nagaland-i 1st 95 atema 88%, 2nd 95 atema 79% aser 3rd 95 atema 98% ngutetogo. Linük den külemi Nagaland-i 2026 tashi nung 95:95:95 atongtsü teimla lir saka iba mapa nung sendaktepa alir ajaki yariteptsüla" ta Khinchi-

i ashi.

HIV ya PWIDS (people who inject drugs), FSWs (female sex workers), MSMs (men having sex with men), TGs (transgenders), prison inmates, migrants amala High Risk Groups (HRGs) dangi nungi "At Risk" nütüing yongsüki menar aser parnok ya HRGs ama mezüingshir, ta paisa ashi.

HIV ajanga melemsar aser asenokia melemsatsüla. Loktiliba kinük ajaklen prevention, testing, treatment aser support atongtsüla ta paisa ayongzüük.

"Asenoki taküm samartem bilemtetba dang masü saka taküm alirtem kümzüksü, HIV keta alirtem yaritsü aser AIDS maliba tarutsü ka yangertsü merangdi" ta Khinchi-isa ayongzüük.

Iba sentong nung NSACS chairman Anoop Khinchi-i tesentepertem tezüngzüktep agidaksü aser NSACS project director Dr. Ahu Sekhose-ia o jembi.

Hornbill Festival nung Mia by Tanishq-i yariteper

Kohima, December 1, 2025 (TYO): Hornbill Festival 2025 atema India nung fine jewellery brand tajungtiba Mia by Tanishq-i Official Style Partner asütsü tesentaktep yangluogo.

Kohima nung Hornbill Festival lapokba sentong nung Business Head Shyamala Ramanan-i iba osang lemsatep aser iba mapang sabang nung Nagaland Chief Minister Neiphiu Rio, bendanger ketdangsürtem aser minister tem liasü.

Kisama Heritage Village nung anogo 10 nü benjungmung nung Mia-i engagement zone ka lapoka lir aser benjung tasemnübuba nung Raj Bhavan nung special-edition

"Mia x Hornbill" pendants sayatsü.

Iba ya sobaliba, teka mapa aser tanü-asüing tetsür ajanga ajungmesoa Mia-i Hornbill-centric jewellery line mezüingbuba yangluba asütsü. Mia-i sobaliba benjungtsü aser India tsürtem melenshiba dak ranglokba iba tesentaktep ajanga sayur ta Ramanan-i ashi.

"Northeast nung artistic maitsü tajung lir aser iba ajanga ozü brand indang design teti ajungmesor aser Dimapur nung Tanishq amenoka lir" ta laisa ashi.

Mia by Tanishq ajanga linük nung exclusive stores 240 tema aser yimtsü 75 nung Tanishq outlets tulutem lapoka lir.

Naga Heritage Village nung 26 buba Hornbill Festival tenzüko



Kisama, December 1, 2025 (TYO): Hombar nikongdang nungi Naga Heritage Village, Kisama nung Hornbill Festival 2025 tenzüko.

Hornbill festival ya Nagaland sorkari kümshia ayongzka amungba tourism benjung lir aser iba benjungmung nung kin ajak sabang ka nung adenshir sobaliba lemsateper.

Nagaland aser Manipur Governor Ajay Kumar Bhalla-i Chief Host ama anogo 10 nü benjung lapoktsü.

Tanü 26 buba Hornbill Festival lapokba sentong nung France, Ireland aser Switzerland nungi Ambassador tem den Austrian Trade Commissioner, British Deputy High Commissioner aser Mia by

Tanishq nung Business Head nunger aden.

Unity Plaza nung Chief Minister Neiphiu Rio, festival host Temjen Imna Along, minister tem, MLA tem, kin balala lennirtem aser nisung meyrjang aika adenshia shilem agiogo.

Hornbill Festival ya "Festival of Festivals" lir aser iba ajanga Nagaland tsüingsangtem, tetsütebou kentem, lisopur saisapong, teka mapa aser chiyungtsü sayur ta Governor Bhalla-i ashi.

Iba benjung ajanga lanurtem, teka mapa inyaker aser entrepreneurs nem tashi agütsür aser alima cultural map nung Nagaland dendaktsür ta pai ashi.

"Kisama nung Unity Plaza ya Naga nunger ka akümba maitsü

63 buba Statehood Day nung Naga yimten latettsü ayongzüük

Kohima, December 1, 2025 (TYO): Chief Minister Neiphiu Rio-i Hombarnü 63 buba Statehood Day sentong nung o jembidang Naga yimten tebilemtsü atema ajaki akhümtsübuba, agizüktetba aser ajak adenba lemtet ka agitsü ayongzüko.

Secretariat Plaza nung Deputy Chief Minister ana, Speaker Sharingain Longkumer, tongti ketdangsürtem aser tesentepertem lia CM Rio-i tawa Political Affairs Committee-i August 23 Ungma Statement pusema nungitba osang lemsatep.

Naga Political Groups, India sorkar aser kin teloktemi külem sabang ka nung adenshitsü aser political level nung olemtep tenzüksü mepishir ta CM Rio-isa ashi.

Eastern Nagaland tebilemtsü atema state sorkari MHA dangi Frontier Nagaland Territory atema draft Memorandum of Settlement nung tebilembatem lemsatepogo aser tekaratiba nung lemtet ka agitsü imlar ta paisa ashi.

"Nagaland nung youth aser sports infrastructure dena wadang balala nung mapa aika inyaktetogo. AI aser innovation mapatem tenzüko, higher & technical education ajungketogo, trade & industry nung temelenshi bener aruogo, connectivity projects tasentem inyaker aser health wadang nung malaria

elimination aser sempet anguba Chief Minister's Health Insurance Scheme amala inyaktetogo" ta paisa metetdaksü.

Centre-i Hornbill Festival mapang Protected Area Permit (PAP) agiena ataba atema pelar aser state sorkari PAP teti atema agentsü mepishir, ta CM Rio-isa ashi.

Sorkari Kohima Peace Memorial & Eco-Park yangluogo, Chümoukedima nung "Nagaki City" atema ali alizüker aser Urban Local Bodies atema gari tasentem alia sanitation tajungba akümtsü meranger ta paisa metetdaksü.

Sorkarisa agriculture, horticulture, sericulture, fisheries, coffee development, NSRLM kübok rural livelihoods aser DUDA kübok arrtsülen renloktsüba maparen inyaker ta CM Rio-isa ashi.

"Iba Statehood Day nung asenok ajaki azükaru aliba tarutsü tajung yangertsü atema inyaka aotsü nangzüki" ta paisa ashi.

Iba sentong nung armed, non-armed forces aser village guards agi akümba contingent 10-i march-past agia liasü. Iba nung Parade Commander ji Deputy Commandant, 1st NAP Battalion Akihito X. Sumi aser second-in-command ji Deputy SP Zareni Yanthan liasü.

CM Rio-i Statehood Day tenüing nung video conference ajanga digital infrastructure

lir. Country Partners 6- Austria, Malta, France, Ireland, United Kingdom aser Switzerland ajanga taküm benjungmung nung shilem agir aser parnok adenba ya putu aika atema tesentaktep apu alaba lir" ta Chief Minister Neiphiu Rio-i ashi.

CM Rio-isa Hornbill Festival 2025 atema Partner State Arunachal Pradesh pelashishia agizüük.

Taküm Hornbill Festival ya district 6 nung sentong noklang aika ayonga amungtsü. Iba nung "Land of the Anghs" ta ajaba Mon district dena lir ta paisa metetdaksü.

"Nagaland ya tetemjen tourist destination ka ama ano maküm saka Nagaland nung alirtemi ainertem pelashishia aser nendaka agizüker. Anungji iba benjung nung adeni arurtemi Nagaland atema ambassador ama aotsü aser medemer teimba anir arutsü ayongzüker" ta CM Rio-isa ashi.

26 buba Hornbill Festival nung Nagaland nungi kin 17-i yartsüingsang, ken aser shilem balala ajanga tesentepertem jangratemdaktsütsü.

Yaküm 25 buba Hornbill Festival nung nisung lakh 2 tema dena liasü.

adenba Children and Adolescents Libraries 120 tashi lapoktsü.

Paisa scholarship maparen tip atemtsü atema Nagaland Scholarship Nodal Cell (NSNC) tenzüksü, inter-departmental coordination atema StateSync App aser tourism experiences tajungba akümtsü atema Discover Kisama App sayatsüogo.

Sobaliba wazüka ayutsü atema CM Rio-isa kin 10 indang traditional attires aser ornaments atema Documented Books mezüingbuba shilem sayatsü.

Paisa disability empowerment mission kübok DREAM Nagaland Book aser artisan skills asoshi PM Vishwakarma Scheme kübo kaketter sayatsüogo.

CM Rio-isa media professionals yaria accredited journalists nem tablet computers agütsü aser Urban Local Bodies nem sanitation vehicles 10 agütsü.

Sentong nung Cantabile ajanga "Cantate Domino" aser The Dream Team ajanga "Warrior's Call" ia sayu. Parnok sülen Meriema (Angami), Zhove (Chakhesang), Shena Old (Sumi), aser Tikhir Cultural Troupe, Kohima ajanga sobaliba shilemtem agia liasü.

Sentong nungsa Directorate of Information & Public Relations ajanga acha-ayangba "Journey of Nagaland Down the Decades" ta ser exhibition ka lapok.

Justice Sanjay Kumar Medhi-i Kisama nung Legal Services Stall semzüksü



Dimapur, Luchii/December 01 (TYO): Justice Sanjay Kumar Medhi, Judge, Gauhati High Court & Executive Chairman, Arunachal Pradesh Legal Services Authority ajanga December 1, 2025 nü 26 buba Hornbill Festival tenzükba mapang Naga Heritage Village, Kisama nung Nagaland State Legal Services Authority-i amenokba Legal Services Stall ka semzükja liasü.

Iba stall semzüksür o tatsüka jembidang, nüburtemi obendangba nüngdaker aser nübur tali awajemtsü atema Stall ya amenok, ta Medhi-i ashi.

Pai panel lawyers aser para legal volunteers tem dang nüngdaka alibapur nem pei temeden agütsütsü ajungshia liasü.

Victim compensation scheme tatishitsü amshia Supreme Court of India-i trial courts dang tekeraba nung

timtem ajurua alir nem teyari agütsüdahtsütsü shia aliba rateta ashi.

Awareness prokshia aser legal tsütsü maparen balala ayongzükba atema Medhi-i State Legal Services Authority nem tenüngsang agütsü aser legal Authority nung inyaktermi ochishia inyakyim ajak kuli bendener ta ashi.

Paisa nübur ajangzüksü asoshi tejangraba tulu nung maneni inyaksü ayongzükba liasü aser District Legal Services Authorities nem Victim compensation Cheque amokja liasü, koba

victim beneficiaries tenüng nung iba cheque ya Principal District & Sessions Judge, Kohima cum Chairperson Kohima DLSA, Mezivolu T Therieh, NJS-i agizük.

Hornbill Festival nung shilem ka ama National Legal Services Authority tawabangba kübok

Nagaland State Legal Services Authority (NSLSA) ajanga anogo ter Legal Services Stall amenoktsü aser legal services ajunga angati agütsütsü.

Sentong nung Member Secretary, Neiko Akami, NJS menden liasü aser pela agizükba o paisa jemb.

Akami-i Stall amenokba ya tongtipang ta ashi aser tongtipang ozüng aser acts tem Naga nung oshi balala aser Nagamese nung meyipzuka lir ta metetdaksü.

Iba Legal Services Stall nung legal teyari agitettsü aser Lok Adalats, Mediation, Victim Compensation, Legal Aid Defense Counsels & Under Trial Prisoners kera chiohtsüba aser ano inyakyim aika indang jangjatetsü.

Anogo 10 tashi iba Stall nung services ya Para Legal Volunteer aser Panel Lawyers temi agütsütsü.

63 buba Nagaland Statehood Day 2025 nung sobaliba sentong ayongzük

Dimapur, Luchii/December 01 (TYO): Secretariat Plaza, Nagaland Civil Secretariat, Kohima nung December 1, 2025 nü 63 buba Nagaland Statehood Day amungdang cultural troupes balalai sobaliba dak sendakba shilem balala agia liasü.

Chakhesang kin nungi Zhove

Cultural Troupe-i sobaliba tsüngsang ka agi par tetsü-tebou tushia aser parnok dang pei tasoli wazüka ayutsü asüngdanga liasü.

Sumi kin nungi Shena Old Cultural Troupe ajanga 'war dance' ka agi shilem agi, koba akhi mapang kika-süchi aser mangko bener aruba sülen tsüngsang liasü.

Tikhir kin sangeri Tsahyoknyi Festival mapang tsüngsangba tsüngsang ka den Sangpin Tah sobaliba ken tena liasü.

Nagaland House, New Delhi nung 63rd Nagaland Statehood Day amung



Dimapur, Luchii/December 01 (TYO): Nagaland House, 29-Dr. A.P.J. Abdul Kalam Road, New Delhi nung December 1, 2025 nü 63rd Nagaland Statehood Day munga liasü.

Sentong nung Joint Resident Commissioner (JRC), Nagaland House New Delhi, Sharon

Longchari-i linük nisan salatsü, kong Nagaland House, New Delhi indang ketdangsür aser staff aser ainer tem dena liasü.

Longchari-i state kumtetba indang bilemteta jembidang timtem ajangshiba, state tila nung nisung million ana dang tajemba süaka mangdang tulu aliba lemsatepa liasü.

Peren Town nung World AIDS Day 2025 mungogo



Dimapur, Luchii/December 01 (TYO): GB Hall, Peren Town nung "Overcoming Disruption, transforming the AIDS response" omen kübok World AIDS Day 2025 munga liasü.

Rovikhoto Mor, DPO, DISHA Peren ajanga iba anogomung ratet lemsatepdang, India nung HIV/AIDS sentong nung takok anguba ya nübur ajungai shilem agiba ajanga lir ta ashi aser COVID 19 pandemic mapang follow up magitetba ajanga HIV/AIDS sentong nung kongshi, ta ashi.

HIV ya lokti tebilemtsü ka lir, kechiaser iba yagi kibong aser lokti nung kongshir, ta pai ashi aser nüburtem dang HIV tendanga anepalutsü aser HIV tashidak agi meneper alirtem bendanga mamshitsü saka ajungshia ano awareness sentong tali ayongzüksü ajungshia liasü.

Sentong akhumdong A. Ernest Sephe, tir, Zeme Council Nagaland ajanga jembidang, HIV/AIDS madak takok angutsü atema ajak lungjemer inyaksüla ta ashi.

Iba tashidak alirtem bendanga mamshitsüla saka parnok temeim nung sako

amshitsüla, ta ashi.

Ilurai-i sentong nung jembidang, iba tashidak agi meneper alirtem asoshi nüburtemi, medical staff aser kinunger temi tongtipang shilem agir, ta ashi.

Ramhei, Women Leader, PTBC ajanga sentong nung jembidang, Tsüngrem nükdang nisung meimchir ajak sako lir ta ashi aser nüburtem dang iba tashidak agi meneper alirtem yaritsü ajungmesoa liasü.

Sentong nung Keletzai Women Organisation ajanga temeja ken ka aten.

Iba sentong nung tetsür lenirtem, arogo nung tenzüker, lanurtem, Town Council züngsem, administration aser colony lenirtem dena liasü.

Sentong nung Besatalu Churah, DSRC Counsellor, DH Peren menden liasü, Pastor Joti Lohe, Tenymia Baptist Church, Peren Town ajanga sentong tenzüka sarasadem aser Pauheugau Rangkau, DIS DISHA Peren ajanga melepzüng o jembia liasü.

Iba mesük sentong District Jail, Peren nung agi aser Children's Home aser Lydia Centre, ZBCC Peren nung Candlelight Vigil sentong agia liasü.

Kiphire nung World AIDS Day 2025 amung

Dimapur, Luchii/December 01 (TYO): DPDB Hall, Kiphire nung December 1, 2025 nü "Overcoming Disruption, Transforming the AIDS Response" omen nung ajemdaker World AIDS Day 2025 munga liasü.

Sentong akhumdong Deputy Commissioner, Kiphire, Temsuwati Longkumer, NCS-i jembidang, alima nung HIV/AIDS indang awareness agütsütsü, iba tashidak agi kongshir alirtem nem akhum agütsütsü aser tashidak nungi kumzüksü, anepalutsü aser temeim sayutsü atema küm shia December 1 nung World AIDS Day ya amunger, ta ashi.

Nisung ajunga dang yimya tasen nung telangzüba agütsütsü

aser melenshitsü aser mela-mela iba tashidak agi meneptsüsa jenjang nung alirtem kata senzuka metoktsütsü ayongzükdang, HIV tashidak den külemi raratsü aser yariteptsü DC Kiphiri ajanga ayongzük.

Iba sentong nung tongti o jembir Dr. Holiba A Anar, Medical Officer ARTC liasü aser pai World AIDS Day puti otsü, nükjidong aser omen rateta ashi.

Nüburtem nem shisatsü agütsüba aser angatetdaksüba nung terenlok lir, saka lokti nungi senzuka yutsüba tang tashi lir, aser HIV/AIDS indang awareness agütsütsü asoshi iba anogo ya tongtipang kumogo, ta ashi.

Paisa iba virus keta aliba

nüburtem yaritsü aser iba tashidak agi takum samar alirtem bilemtetsü ayongzükba liasü.

Iba sentong nung Rozila ICTC Counsellor menden liasü, DLN Kiphire ajanga o tatsüka jembidang Mission Shakti aser sorkar sentong kübok scheme balala aliba indang awareness agüja liasü.

Sentong tenzüka Tsilongse UDA, DC's Office Kiphire ajanga sarasadem, Tsiatsuvi, DPO DISHA ajanga pela agizükba o jemb.



Civil Defence Wardens & Volunteers training tembangba sentong ka Hopongkyu Memorial Hall, Kiphire nung agidang tangokba noksa nung ketdangsür aser shilem agirtem angur.



New Delhi, December 01, 2025: Hombarnü asükwa mongpu Parliament senden tetenzük anogo nung Ato kilonser, Narendra Modi Parliament House-i arudang tangokba noksa nung angur. Kasa noksa nung Union Minister tem- Kiren Rijiju, Jitendra Singh, Arjun Ram Meghwal aser L Murugan nungera angur.

Parliament mezüng anogo nung SIR onük nung rongrong adok

New Delhi, Luchii/ December 01 (Agencies): Hombarnü asükwa mongpu Parliament senden mezüng anogo nung opposition party temi Special Intensive Revision (SIR) onük nung o lemteptsü takhangba agütsüba sülen rongrong adoka liasü.

Asükwa mongpu senden ya December 19 nü tembangtsü.

Amongnü sorkari ayongzükba party ajak senden nung opposition party temi sorkar dang, parnoki Parliament nung tashiyim amshia SIR onük benoktsü, aser Parliament senden junga magiteta ibajibo sorkar khuret asütsü, ta metetdakja liasü.

Senden tembangba sülen Parliamentary affairs minister Kiren Rijiju-i, "Opposition-i SIR onük nung o lemteptsü akhangbaji sorkari shisadangdar. Ibaji sorkari magizüker masü. Sorkari SIR densema onük ajak nung o lemteptsü melunga dang lir, ajisüaka telangzüba agütsütsü atema onok nem mapang agütsütsüla. SIR atema o lemteptsü asoshi mapang tatakzük magütsütsüla," ta metetdaksü.

Union Minister aser LJP nungi MP, Chirag Paswan-i, "SIR indang onük ka kija nung ajemdaker opposition-i Parliament senden piyong timtem agütsütsü. Item amaji ajanga tang mezüngpur MP tem kongshitsü, kechiyong parnoki pei constituencies atema inyakner aser senden nung tebilemba onük balala benokner.

Ato kilonseri tebilemtsü akabaji tim dang, kechiyong ozü nüburtem aser linük atema inyaksü asoshi küm 5 dang lir," ta ashi.

JD(U) MP Sanjay Jhu-i, "SIR onük nung tesüiba senden-a magiteta liasü. Iba mapang nungjibo Bihar nung SIR tagidak liasü. Election Commission-i party ajak dang iba inyakim nung tashishitsü lira agüjang ta metetdakja liasü saka party kati danga tashishiba magütsü," ta ashi.

BJP MP, Jagdambika Pal-i, "Parnoki (opposition) senden nung timtem agüja sabangleni arura, iba tetezü parnoki SIR onük nung o lemteptsü masü saka senden magidaksünar dang. Parnoki SIR nung kechi jembiner? Bihar nung nüburtemi telangzüba agütsüogo aser SIR dak sendakba onüktem nung telangzüba agütsüogo," ta metetdaksü.

Congress MP, Priyanka Gandhi Vadra-i, "Election tensa, SIR aser mopung kanga menenba onüktem ya tebilemtsü onük tulu. Asenoki iba atemaji o lemteptsüla. Parliament ya kechi atema? Iba ya jilushi aitsü atema masü. Tebilemtsü onüktem jembiba mesüra benokba ya jilushi masü. Democratic inyakim nung ajemdaker nüburtem dak sendakba tebilemtsü onüktem jembitsü memelabaji ang jilushi lir," ta ashi.

Trinamool Congress nungi MP, Saugata Roy-i, "Opposition-i pei tangatetba nung nokdaksü.

SIR aser Delhi nung kiralongrartemi amakba ama tebilemtsü onük aika lir, anungji opposition-i maneni item onük benoktsü. State tem nem tagütsütsü aliba senotsü magütsüba-a onoki benoktsü," ta metetdaksü.

TMC MP, Abhishek Banerjee-i, "Opposition-i SIR onük nung o lemteptsü atema akhanger. Iba ya jilushi asü? Nüburtem dak sendakba tebilemtsü onüktem benokba ya jilushi süra taruba election nung nüburtemi telangzüba agütsütsü. BLOs densema nisung 40 süadokogo. Parnoki Election Commission nem tai tongloktsüogo. Onoki SIR anema menokdaker saka iba inyakim anema nokdaker," ta metetdaksü.

Samajwadi Party nungi MP, Akhilesh Yadav-i, "SIR atema shisabulua bilemba tanübo atangji nung ataloker. Vote ka agienra nisung ka tebilemba koma ataloktsü. Tang tagidak SIR ya democracy tashi itshitsü atema masü saka votes agentsü atema lir. Atangji nungbo BLOs-i forms-a fill up mesüteter; parnok aika kanga ani-belemogo. Uttar Pradesh nung election agitsü mapang ana nung mali, süra kechiba yamai ariteper?" ta asüngdang.

DMK nungi MP, Kanimozhi Karunanidhi-i, "Opposition-i SIR atema, linük nung election inyakim aser democracy kümzüksü atema o lemteptsü. Iba atemaji onoki temepishiba agüja arur," ta metetdaksü.

SC-i Delhi nung mopung menenba asalentong reprangshitsü tuyur

New Delhi, December 01 (Agencies): Hombarnü Supreme Court-i Centre sorkar aser tim ketdangsertem dang Delhi NCR nung mopung menenba nokdangtsü atema benoka aliba asalentongtem reprangshia asadangtsü tuyuogo.

Chief Justice of India, Surya Kant-i, "Temelenshi karbo adoker asü madokar metettsü atema nenoki benoka inyakba asalentong reprangshitsüla masü no? Asadangtsüji tongtibang, ta onoki bilemer. Nenoki benokba sentongtem takok ngur asü mesüra takok junga mangu? Nenoki arendak yonga, temelung lemtetyonga mesüra telemenshi liaka nenoki benokba mapatongtemji asadangtsüla masü no? Tang tashi nung nenoki mera agia inyakba mapatemji asadangtsüla," ta metetdaksü.

Supreme Court-isa CAQM

tenüng nung ken o jembitsür ASG Aishwarya Bhati danga, alu nung jana arongba ajanga mopung menentsüba dak alia tanga kuli balala ajanga mopung menentsüba asüngdanga liasü.

Court-i, mopung menenba atema aluyimertem kija nem tai metongloktsütsüla saka tanga kuli balala ajanga mopung menentsübaji scientific lenlatem ajanga asadangtsüla, ta ashi.

Court-i, "Alu nung jana arongba ya akhidang nungi benshia aruba inakyim ka lir. Süra kechiba küm 4-5 tejaklenbo nisungtemi anüng sentsü reprangteta liasü, saka tangbo anüng sentsü mereprangteter?" ta asüngdang.

Supreme Court-isa, court-i ita shia anabenbosa mopung menenba onük ya benoktsü, ta metetdaksü.

Court-i maneni iba ken o ya December 10 nü angadangtsü.



December 01, 2025 nü Kolkata nung West Bengal nung opposition lenir, Suwendu Adhikari leniba nung BJP lenirtemi state Chief Electoral Officer, Manoj Kumar Agarwal ajurudang tangokba noksa nung angur.

NDA-i tetsür nem sen 10,000 agütsüba agi INDIA teloktepi makok: Cong

Patna, December 01 (Agencies): Hombarnü Congress lenir, Shakeel Ahmed Khan-i, tawa assembly election nung opposition INDIA teloktepi tamakok anguba tongti kuliji Bihar sorkari scheme ka kübok tetsür lakh 10 nem nisung shia sen 10,000 agütsütsü telemtetba agiba ajanga lir, ta metetdaksü. Senotsü agütsüba ya 'sübokrem' lir, ajisüaka kechiba Election Commission-i iba anemaji kecha meinyak, kechiyong model code of conduct (MCC) benokba sülen tetsürtem nem senotsüji agütsü, ta paisa metetdaksü.

Assembly menden 243 aliba state nung BJP-i aniba NDA teloktepi menden 202 nung takok angu aser INDIA teloktepi menden 35 nung dang takok ngua liasü.

"Election jakdang NDA sorkari tetsür shia nem sen 10,000 agütsüba anema kechiba Election Commission-i ola madokar telangzüba agütsütsüla. Onoki tamakok anguba tongti kuliji parnoki sübokrem agütsüba agi lir," ta Khan-i ashi.

NDA sentong nung Election Commission-i anidaker, ta shia Congress leniri, "Puti otsü nung ya bilemtettsü. Parnoki (NDA party tem aser ECI)-i iba atemaji telangzüba agütsütsüla," ta ashi.

Bihar election asadanga

Congress lenirtem senden ka amenba sülen osangbenertem den jembidang Khan-i Ato kilonser Narendra Modi-a aitsü.

"Parnok sorkar menden nung lir, anungji mapa inyaksüji NDA mapa. Mapa inyaksüji Opposition khuret masü," ta ashi.

Bihar Congress Tir Rajesh Ram leniba nung amenba senden nungji district committees nung Tirtem aser department balala nungi tongtipurtem dena liasü. Iba senden nungji Congress' Bihar in charge, Krishna Allavaru-a liasü.

Ahmed-i, Bihar nung INDIA teloktepi tamakok angubaji sorkar machinery ajanga lir, ta ashi.

Ano Bihar Congress women wing Tir menden nungi anenla, Sarwat Jahan Fatima-ibo, tetsürtem nem menden peria melemzüksüba ajanga party-i tamakok angu, ta ashi.

Lai, "Tetsürtem nem menden shilem 33 lezmükja lir, ajisüaka tetsürtem nem tickets shilem 8 dang agütsü. Ibayongji ni menden nungi anen," ta metetdaksü.

Ano Patna District Congress Committee Tir Shashi Ranjan-ibo, "INDIA teloktepi tamakok angubaji RJD lenir Tejashwi Yadav ajanga lir. Iba teloktep nung tongtiji RJD liasü anungji tamakok anguba atema parnoki tenüng agitsüla," ta ashi.



December 01, 2025 nü World AIDS Day anogomong nung Bhopal nung kaketshirtemi ozülü balala amer awareness sentong nung shilem agiba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, DECEMBER (LUCHII) 02, 2025

HIV/AIDS Anema Tongbang

Tang India nung Adult HIV prevalence rate teimtiba state tem rongnung Mizoram sülenbo tanabuba jenjang nung Nagaland (1.37) lir, aser ibaji national level rate 0.21 dang nungi teimba, ta state sorkari sangdongba osang ya osangtajung kabo masü. December 1 nü World AIDS Day anogomong nung Commissioner & Secretary Health & Family Welfare, Nagaland aser Nagaland State AIDS Control Society (NSACS) Chairman, Anoop Khinchi-i iba osang ya metetdaksü. Tang Nagaland nung nisung meyrjang semer shi dak HIV/AIDS keta aliba puteta lir ta Nagaland State AIDS Control Society (NSACS) ajanga metetdakja lir. Iba tashidak mesen keta liaka timmedemi alitsü aser loktiliba nung mesendoki tangar den kasa litettsü NSACS-i kanga meranga inyaka arudar. World AIDS Day anogomong nungsa tanga sentong ka nung NSACS Project Director, Dr. Ahu Sekhose-i, India nung global initiative "95-95-95" alizüng tongtetba state 6 rongnung Nagaland densema lir, ta sangdongba osang yabo tanganütsüka. '95-95-95' target tetezü HIV keta alirtem shilem 95-ibo parnok dak iba mesen keta aliba metetba, iba HIV puteta alir shilem 95-i treatment agiba aser shilem 95 treatment attain viral suppression agiba lir. 2030 küm tashi nungbo HIV/AIDS ya public health tebilemstü ka masütsü nükjidong yur India nunga state ajaki 95:95:95 mapatong ya benoka inyaker. Taküm October ita tashi nung Nagaland-i 1buba 95 nungi shilem 88, 2buba 95 nungi shilem 79 aser 3buba 95 nungi shilem 98 tongtetogo. India sasep nung Nagaland-i junga inyaktetba ajanga tawa National AIDS Control Organization (NACO)-i state nung aliba Integrated Counselling & Testing Centres (ICTCs) 38 nem five-star quality certification agütsüogo. India nung HIV prevalence rate tsütsü Mizoram sülenbo tanabuba jenjang nung Nagaland lir, ajisüaka Northeast state tem nung HIV kanga bulua akümyonga 2004 küm nungi Nagaland nungbo iba tashidak azüokteta arudar, ta Dr. Sekhose-i metetdaksü. Ano külen NNagaDAO Tir, Abou Mere-i, iba tongbang raraba tsütsü lenla aika nung tajungba kümdar, ajisüaka lanurtem rongnung ano shisabulutsüsa tebilemstü tasen ajangshidar, ta metetdaksüogo. Nagaland nung iba tashidak mesen ya talisa High Risk Groups (HRGs)-temesepba mozü injection aturtem, tetsür teküp ayokertem, tebur o tebur na shi nung medemertem, tepuokdak alirtem aser tesem melenshia alirtem ajanga proker ta jembia aruogo, ajisüaka aika mekümdangi aliba ajanga menazüker. Küm aika tejaklen AIDS tashidak agi Africa lima nung nisung jenti asüba otsü angashidang kanga tsübuwa bilemogo. Alima nung iba tashidak puteter joko küm 44 ajung tashi nung asen Naga lima nunga meyrjang aika dak iba tashidak putetogo. Aji oda iba tashidak den raraba tongbang ya kanga tulu, anungji küm shia asentenshir iba tashidak anema nokdaksü atema 1988 küm nungi tenzüka alima tesem ajaklen December 1 anogo ya AIDS Day amonger. Atangji yashi ama (December 1) World AIDS anogomong amongba mapang asen lima nunga AIDS anema tongbang raraba asadanga maneni asalentong tajung karbo yanglur inyaksangshitsü imlar. Iba tashidak keta alir nisung aikati tangar dang timtem meshitet kangshidar. Ajisüaka, iba tashidak keta aliyonga temang anema alir den kasasa arrshia alitsüsa mozü tajung agütsür, anungji odiodia treatment agitsü atema ajungshiteptsü nüngdaker.

OLEMSABANG

AROGO NUNG MEPUTEP, TARISHITEP ASER TELEMSA MALITSÜLA

~ L. Kika Pongener.

Tanü asen lima nung arogotem reprangdanga ora; arogo aika tenung agibo Khristar arogo, saka telung nungpo Khristar arogo memesuk; tanga lokti-tentet ka dang mesuka angur. Talisa, Aor arogo aika nung, arogopur rongnung meputep, tsükchitep, tarishitep aser telemsa agi sunga aliba angur. Ano kanga tesasatsüka, arogo aika nung toklang tenzükertem tsüngda nung meputepba; tenzüker/tenzükla tsüngda nunga meputepba; kati ka majinuba, kati ka sensa-masa-a nemja-lutsütepba angur. Surabangla, arogo nung toklang tenzükertem tsüngda nunga meputepba....Arogopurtem dang longjema aser putepe alitsüba indang koda sayutsüngitsü (?) Meputepi aser telemsa aliba arogo ka nungji kodaser Tsüngrem Tanelai mapa inyaksü (?) Meputepi aliba arogo ka nung kodaser Tsüngrem sentsüwangshidaksütsü (?) Khristar arogo kaji inyakyim/sentong ajak nung laishibai sayuba aser Tsüngrem o nung amendaker anitsüla; aser iba inyakyim aser sentong nungji toklang tenzükertemi anir tenzükertem/tenzüklatem aser arogopur ajungai tashi anga-a anidakra; shitakba Khristar arogoji iba arogoji asütsü. Tsüngrem o-i ashir, "Arogoji pongmen sushia, kangtenba sushia, ibala kecha makai, Temeshi aser tai makai litetsü; Pai iba sentsüwangshi arogo nem agutsütsü asoshi; Khristai arogo dang meim aser pei sasa iba asoshi bendanga agutsü. Ajioda, Khristai arogoji mesur aser anepalur; kechiaser asenok pa mang tenuk-telen lir" (Efesa-5:26-30).

Paul-i Korint nunger dangi züluba shiti nungji züngra, Korint arogo nung telok pezü küma lemsar aliba angur. Arogo balala küma lemsaba masü, saka arogo telung nung arogopur rongnung telemsatep liasü. Yongji, Paul-i parnok dang tekümdangtsü o shia züluba angur. Korint arogo nung arogopurtem rongnung....Paul telok, Apolo telok, Kefa (Peter) telok aser Khrista telok...ta lemsar liasü. "Nenok nisung shiai yamai ashir...Ni Paul nubu; Ni Apolo nubu; Ni Kefa nubu aser Ni Khrista nubu" (1 Korint-1:12-13). Ashiko, Korint arogo nung aliba arogopurtemi Paul, Peter aser Apolo nungerji Tsüngrem ama kümdaksü sudi, aser arogopurtemji parnok sulen anidaka; telok balala küma lemsa sudi. Tanü asen lima nunga, lim arogo aika Korint arogoji mesuka; arogo telung nung telok-telok lemsar alitsü akok. Arogotem nung toklang tenzükertem atema kanga tekümdangtsü kaji....Tatishitsü ka, arogo nung Pastor telok, Associate Pastor-tem shia pa/la telok; Home Evangelist telok, Deacon telok, Counsellor telok etc. ta lemsara....Iba arogo dangji khristar arogo ta koda ajatsü...??? Aji oda, arogo nung mepetmesu, petsaperong aser telemsa adoktsüsa tenzüker, tenzükla aser arogopur shibai sentong atongdir aser tongti shilem agidir...Pa/la-bo ayatai asütsü, kechiyong arogo ya Yisu Khrista temang nung tenuk-telen ka lir (Efesa-1:23). Anungji Yisu Khrista temang tenuk-telen nung tim-atemtsüsa shibai/shinoki sentong atongdir pa/la-bo khuret tulu asütsü.

Ano Korint arogo nung Tanela sempet akartem tsüngda nunga telemsatep liasü sudi. Yongji, Tanela sempet akartem danga Paul-i tekümdangtsü o shia züluba angur. "Tanela sempet tapu-tapu lir, saka Tanela ka dang. Aser tenzüka tapu-tapu lir, saka Kibuba ka dang. Aser mapa tapu-tapu lir, saka Tsüngrem shibai ajak nung ajak inyaker pa ka dang" (1 Korint-12:4-6). Ajioda, tanela sempet akartemji arogo asoshi nukdang tajung aser tenungiter ka-ka asütsüla; aser arogopurtem, toklang tenzükertem aser tenzüker/tenzüklatem dang Tsüngremi jembiba, sayuba aser Tanela o agi ajungshitsüla. Aji oda, parnoki arogopurtem tanela nung nungita aser pusema yaritsü melena, parnok tsüngda nungang lemsara....Tsüngrem tsüngdang sentsüh tulu asütsü. Ashiko, Korint arogo nung arogopur tsüngda nung telemsa aliba agi, Tsüngrem o-jia nisung o ama kümdaksü sudi, mesura tamashi o ka ama kümdaksü sudi. Yongji, Paul-i yamai züluba angur. "Kechiyong shirnok samadagi parnok asoshi kangki o-ji tamashi o ; Saka asenok kümzüka alirtem asoshi-bo ibaji Tsüngrem ain lir" (1 Korint-1:18).

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Journey Arogoi pastor, Joshua R. Rene atema mangyimer



Luchii/December 01, 2025: Florida nung aliba Arogo kati pastor ka atema mangyimer; tanur pezü tebu aser arrshi küm 39 pastor Joshua R. Rene ya Journey Arogo nung executive pastor teninyakdak liasü.

Pa taoba hopta motorcycle lendong nung asü.

Amongnü (November 30) tekülem sentong nung Arogo züngsemtemi pa bilemteta liasü aser iba sentong nung 'lenden nung tamang jenjang' onük jembia liasü.

Journey Church ya non-denominational Arogo ka lir. West Palm Beach, Lake Worth Beach aser Boynton Beach nung iba Arogo indang campus kaka amenoka lir.

Pastor Joshua ya tebu tajung ka, Arogo nendaka tenzüker ka aser tamangtir ka liasü.

Arogo indang Facebook Page ajanga tongti Pastor, Scott

Sri Lanka nung Evangelical Arogoi yipru agi kongshibapurtem yari

December 01, 2025: Anogo ishiika tejaklen Sri Lanka nung Cyclone Ditwah lendong nung nisung 330 dak tali asüba sülen linük nung Evangelical Arogoi emergency relief tenzüka iba yipru agi kongshiba züngsemtem nem teyari agütsüdar.

Iba lendong nungsa nisung noklang aika samaogo aser meyrjang aika talidak makai lir.

Tan hopta National Christian Evangelical Alliance of Sri Lanka (NCEASL)-i "Emergency Flood Relief Appeal" sangdonga liasü. Iba lendong ajanga pastor tem, Khristian workers aser Arogotem nung züngsemtem-a aika kongshio.

Iba cyclone ajanga tesem aika nung tzünglu sashia aru, anentsüh lendong atalok aser ki aika anenzüka ao, ta sorkari

jembidang pastor Baugh-i, "Pai memeimba nisung ka danga maliasü. Pai ajak nem mapang agütsütetsa liasü. Josh ya teti pelaa dang liasü," ta ashi.

November 25, 2025 aonung 7:00 ako atongtsü mapang anasa GMC Diera pickup gari kati Pastor Rene indang Harley Davidson motorbike dak tsükoktsüba lendong nung pa asü.

Palm Beach County Sheriff's Office ajanga ashiba agi, pickup gari anisang jagi Rene motorcycle nung arubaji manguba ajanga iba lendong atalok.

Pickup jagi motorbike dakji tsükoktsüba sülen pastor Rene bike nungjagi jekteta anüngleni atuba sülen lenmang nung ondak; pa iba tesem nungjisa asü.

Arogoi Facebook page ajanga Rene'er kibong atema sarasademjang, ta mepishia metetdaksü.

"Onoki meima aliba pastor Josh ajungbena asüba sülen onok mangyimba mapang nung yimlibilema Rene'er kibong atema sarasademjang," ta Arogoi metetdaksü.

Rene asüba osang sangdongba Facebook post nungji nisung kati, "Kibubai pa dang, 'Nai junga inyakogo kü kilir tajung' ta shiogo," ta lemsatep.

ANOGO ABEN TSÜNGREM DEN

Akhümtsübutep

Khrista tsübuba nung nenok peisasa kati ka kübok liang. Efesa 5:21

Kati ka den akhümtsübu mesayubaji züpazüpa magitsüla. Yisuji asenok lenitsü tatishitsü lir. Pai ajak dang akhümtsübu tulu sayu, talisa shirnok tangari mezüngoki ali parnok dang Pai akhüm tsübu. Khristai, tangar asoshi bilemtsüba indang Pauli tanü lesson nung kati ka kübok alitsü ashi. Iba nung asen tejangraba dang nungi tangar tejangraba tama südaktsüba, asen tebilemba dang nungi tangar tebilemba tama südaktsüba dena lir. Khristan yimsü nung tangar madak kibur akümtsüba menden mali.

Asenok ajak alangzüksü asoshi Yisui Pa taküm agütsü. Ajak nem jenjang agi malizüktetba sempet agütsü. Iba akhüm tsübu tulu Khristan mozü ki aser nüngdakba pur yariba lokti tentet nung dena lir. Iba akhüm tsübu nung telemsa arla lokdoker aser ozüng raksaba, tejak ajiba, ochi meshi-i asenok rongnung inyakba indoktsü bushir.

Ibai kidang tenzüker. Khristan jakla liro angazükdakji kibongji lir. Ibai training agidak ka lir. Idaki o agi dang masü taküm libaliro ajanga Khristan yimya angazükdaksür. Kidang tangar nüngdak aser taginüba nung yaritsü renema lidaksür. Koba kibong nung pei atema dang bilemtsü angazükdaksür iba kibong den kiyonger sünür malir, Khristan kulisüba nung tamakok aludaksür. Kibur Tsüngrem, onok nung kati ka dang akhümtsübutepa alitsü, aser Ne mapa jungkai adokdaksütsü yariang; Kibur, Kümtedakba Yisu tenüng nung; Amen.

Sudan nung nisung kari Tenla ki ana nung o zülusaja toktsü



December 01, 2025: Sudan kübok Port Sudan yimti nung nisung kari Tenla ki ana nung o balala zülusaja liasü.

Sudan Evangelical Presbyterian Church Tenla kima jara nung rong temerem agi yamai zülusaja liasü- 'Allah dak alia tanga Tsüngrem mali aser Muhammad ya Pa tenyar'.

Parnokisa, "Pa dak alia tanga Tsüngrem mali, Tetushi Chuba menden Kibur" ta zülüja liasü.

Ano kasa yimti nungjisa Orthodox Church Tenla kima jara nung 'Allah ya tatem maka' ta zülusaja liasü.

Nisung kar gari ka nung aruba sülen rong temeren 'spray' amshia Tenla ki jara nung zülusatsüba CCTV noksa ajanga jangja.

Tenla ki ana ya Sudan nung Khristantem tekülem ki

tejentibatem rongnung densema lir. Tenla ki anaprongla ya Port Sudan Market tiyongtsülen police station ka aser official state administrative buildings anasa lir.

2023 küm nungi tenzüka Sudan nung Sudan Armed Forces (SAF) aser Rapid Support Forces (RSF) na tsüngda raradang Khristantem kanga takoksa ngua arudar.

Tenla ki ana ya Port Sudan yimti tiyongtsülen liaka tang tashi police aser ketdangsertemi aibelenertem anema kecha meinyaker.

Iba dak alia tensa tamajungba mekümdaksünüba agi Evangelical Church-ia iba tatalokba anema ken o mebenok.

Christian Solidarity Worldwide (CSW) den jembidang Evangelical Arogo

nungji züngsem kati, "Iba ya taosatsüka lir, kechiyong iba ya tang tetenzüker asütsüa akok. Tesempa agi ano kechisa ataloktsüar asenoki meteta mali," ta metetdaksü.

CSW CEO, Scot Bower-i, "Sudan nung Khristantem tekülem ki tejentibatem rongnung ana anema inyakba osang angashia onok aoksar. Khristmas mongpu atongtsü anasa item ama tatalokba ajanga Sudan nung Khristantem tsübudaksütsü. Onoki ketdangsertem dang item tatalokba bushisüngdangtsü aser aibelenertem nem temerenshi agütsütsü akhanger. Khristantem sademsadema tekülem agitettsü atema Khristantem nem security agüjang ta onoki mepishir," ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tsükpo**

(n) sentsü tanak den tepui tera meyoktepba ozü (bulbul)

* Tsükpo ozüi Yimsenpirong dang tzü sayu.

Tsükpok

(v) oset ka nung tapok adoktsüsa atsük (make hole by hit)

* Lenmang majungba agi gari telonglen tsükpok.



Tir Yimyim

OLONG PAITEP # 7347

1			2			3			4	
			5		6		7			
8										
			9							
	10									
								11		12
			13				14			
15						16				

TIPLIN

1. Anenzükdak ki - (5)
3. Asür mangyimba - (5)
5. Temulung nung shisadang - (5)
8. T ___ lu - (3)
10. Takdang temalen - (9)
11. Tesa ___ a - (3)
13. Ajungbena temulungjang
tongtonglatsü atu - (5)
15. Tejen lai nung tesayur - (5)
16. Tsüingsak-mopung - (5)

LANGTSÜNGLEN

1. Reprangdaksü - (4)
2. ___ ur - (3)
4. Kiojen yangludak - (6)
6. _____ ait - (7)
7. Nagaland nung ayong ka - (5)
9. Küm kasa purtem - (5)
10. Tetsüng tajemtdak - (6)
12. ____ adenshi - (4)
14. Tsünüsenbongtsü adokdak - (3)

OLONG PAITEP # 7346 TELANGZÜBA**TIPLIN :**

1. Aben, 4. Artsü, 7. Lisem, 8. Liwa,
9. Sarasadem, 12. Aket,
14. Mangu, 15. Anünü, 16. Ango.

LANGTSÜNGLEN :

1. Aruli, 3. Balala, 5. Suwar,
6. Belem, 9. Süjak, 10. Aonung,
11. Dokan, 13. Tinu.

NAI-A YA METETTER

Madhya Pradesh Chief Minister Mohan Yadav'er jabaso Dr Abhimanyu Yadav aser Dr Ishita na November 30, 2025 nü Ujjain nung lokti kiyimba sentong ka nung kibong kümogo. Iba lemtet atema Governor Mangubhai Patel-i Madhya Pradesh CM Mohan Yadav nem tenüngsang agütsüogo.

CM Mohan Yadav-i par jabaso tanubosang Ujjain nung mass marriage ceremony nung kibong kümdaktsüba ajanga lokti putepa aliba tatishitsü tajung sayur ta Mangubhai Patel-i ashi.

Tripura Raj Bhavan dang 'Lok Bhavan' ta ajar**Agartala, December 1, 2025**

(Agencies): Tripura nung Raj Bhavan dang asüng December 1, 2025 nungi Lok Bhavan ta ajatsü.

Governor Indrasena Reddy Nallu-i Union Ministry of Home Affairs den asüngdangtepa sülen tenüng melentsü tetuyuba agütsü ta Raj Bhavan ketdangpurtemi ashi.

Centre sorkari tetuyuba agütsüba den tenüng

melenshiba puteper aser nomenclature guidelines sülen Governor's House nüngja melenshir. Asüng nungi Raj Bhavan dak sendakba ajak tenüng tasenba amshitsü ta Raj Bhavan ketdangpurtemi metetdaksüogo.

Tarutsü anogotem official signage, documents, communication materials, aser ceremonial protocols inyaka aotsü osang tejangja

metetdaksütsü ta parnokisa ashi.

"Raj Bhavan" ajanga chuba alidak ka ama sayur, ajisüaka democratic system ka nungbo iba ki ya nübor meyong lir. Anungji December 1 nungibo "Lok Bhavan" ta melener aser public-i ketdangsürtem den ajuruteptsü atema visiting hours lezmüksütsü ta Tripura Governor Indrasena Reddy Nallu-i metetdaksü.

Cotton University kima nung ST jenjang anema lungkak ait**Guwahati, December 1, 2025**

(Agencies): November 30, 2025 nü Cotton University jakdang kaketshirtem aser lanurtemi Assam sorkar lemtet anema lungkak aitogo.

Group of Ministers-i kin trok nem Scheduled Tribe (ST) jenjang agütsütsü tebilemba Assam Legislative Assembly nung benokba ajanga lisopur teloktemi lungkak ait tenzükogo.

Kin trok nem ST jenjang agütsüba ajanga tang Assam nung Scheduled Tribes pur temeten nung kongshitsü. Kin talila nem ST jenjang agütsüba ajanga constitutional protections, land rights, reservation benefits aser socio-political safeguards menentsü ta kaketshir teloktemi ashir.

Cotton College jakdang lungkak aйдang Bodo Students' Union, Mising Students' Study Circle, Takam Mising Porin Kebang, Dimasa Students' Community (Guwahati and CU), Greater Guwahati Karbi

Students' Union, Rabha Students' Society aser Tiwa Literary and Heritage Students' Forum züngsemtemi shilem agia liasü.

Sorkari tang aliba ST nunger temeten ajak kümzüka ayutsü aser mekongshitsü ta nangzüksüla. Assam Land and Revenue Regulation, 1886 nung Chapter X ajanga Tribal Belts and Blocks kümzüka ayur anungji iba ya tang aliba Scheduled Tribes atema dang asütsüla ta kaketshirtemi memorandum ka agütsüogo.

Parnokisa Bodoland Territorial Council (BTC) dang No Objection Certificate (NOC) kecha magütsütsü ayongzükogo.

BTC-i kin kar nem NOC agütsüba ajanga tang aliba ST nunger land rights mesüra constitutional protections nung kongshitsü akok. NOC agüjadoker lira tangsa meyipa agütsüla ta kaketshirtemisa ashi.

Külen, Kokrajhar district

administration-i BTC Secretariat Complex aser temeket nung

Bharatiya Nagarik Suraksha Sanhita, 2023 nung Section 163 (taoba Section 144 of the CrPC) benokogo.

Lisopur kaketshirtemi lungkak aйдang BTC Assembly House raksatsüba sülen iba lemtet agiogo.

"November 29 nü BTR nung lisopur kaketshir telok nung züngsem kari temelaba kecha meli BTC Secretariat nungpoka atu aser Secretariat Hall nung aliba osettem raksatsüba osang angazükogo" ta District Magistrate Masanda M. Pertin, IAS-i ashi.

Ozüng alema lungkak aйтba mesüra tashiyim agi adenshia sentong agidang sorkar ketdangsübaren nung timtem ajurutsü akok aser meimchir taküm den kiojen lendongi aitsü akok. jagi Bharatiya Nagarik Suraksha Sanhita, 2023 benoker ta DM Masanda-i ashi.

COCOMI-i December ita piyong lungkak aittsü amokmerener**Imphal, December 1, 2025**

(Agencies): Manipur nung internally displaced persons (IDPs) ajak December tashi nung talidak magütsüra lungkak aйтba manentsü ta Coordinating Committee on Manipur Integrity (COCOMI)-i metetdaksüogo.

Honibarnü IDPs noklang aikati otsütsü aйтba Kangla Fort jakdang lungkak aйтba sülen COCOMI-i iba osang lemsatop.

Lungkak aйтtemi Imphal West nung Uripok Achom Leikai tashi jajayonga ao aser idakji COCOMI kübok senden ka amen.

Senden amenba sülen

COCOMI-i December ita piyong state tesem balala nung lungkak aittsü aser ibaji sorkari nangzükba ama meinyak tashi agitsü ta bangjemtepogo.

"Manipur sorkar tang President's Rule kübok lir aser taoba nung arrtsülen aliba IDPs ajak December 31 tashi nung talidak agütsütsü ta nangzüka liasü" ta COCOMI convenor Khuraijam Athouba-i ashi.

Ajisüaka tang tashi nung iba asoshi mapa inyakba kecha mangur aser December ita tenzük. Nübortemi yaria IDPs-i taküm kümsa pei pei tasoyimi aotsü atema temeten meshitsü ta Athouba-isa

metetdaksü.

"IDPs-i memulungaka sorkari Sangai Festival amunger. Nisung meyrjang aika pei talidak melii timtemba mapang benjung amungba ya tim masü ta nisungtemi bilemer. IDPs-i sorkar dang benjung masü saka parnok talidak yoktsüba nung temulung agütsütsü ayongzük saka iba temepishiba magizük" ta Athouba-isa ashi.

Tanü Sangai benjung temogo aser asüng nungi COCOMI den IDPs aser public-i December ita piyong IDPs pei talidaki me yok tashi lungkak aittsü ta Athouba-isa shisem.



November 30, 2025 nü Bhagyachandra open-air theatre nung 12 buba Manipur Sangai Festival takok ngua tembangogo. Iba sentong nung Governor Ajay Kumar Bhalla-i Manipur Sangai Festival ya national aser international outreach platform ka lir ta ashi. Taküm benjungmung nung India aser bendang linüktem nungi tourism sector den sendaktepa alirtem aikati shilem agiogo.

Sheikh Hasina ano küm 5 tepuokdak ayutsü obendang agütsü



Dhaka, Luchii/December 01 (Agencies): Dhaka yimti tezülen sorkar ali project ka nung ochimashi mapa inyakba dak sendakba nung Bangladesh court kati, ato kilonser menden nungi atsüngdoker alila Sheikh Hasina küm pongu aser lar tenur jala British Labour Party MP Tulip Siddiq küm ana tepuokdak ayutsü obendang agütsüogo.

Iba obendang ya Dhaka indang Special Judge's Court indang Judge Rabiul Alam-i agütsü, kong Hasina-i Ato Kilonser ama tim masüba nung tashi amshia Purbachal New Town project nung ali lemsadaksü aser Siddiq yagi tetsü asoshi kimong ka tim masüba yimya nung meshitsü ta ngutet.

Court yagi Hasina tenu aser Siddiq tetsü Sheikh Rehana küm tenet tepuokdak ayutsü obendang agütsü, shiba ken o nung shilem agir tongti ta ashir. Par asemprong kata okadaki maru.

Taoba küm sorkar anema nüburtemi longkak aita Awami League sorkar chirepba sülen Hasina ya Bangladesh nungi jena oa India nung alir aser Siddiq yagi item tai tonglochtsüba kata magizüker.

Iba obendang ya Hasina asoshi ken o balala benoka jembiba nung tali bendenlokba alitsü.

November 27 nüa Dhaka court kati Hasina ya Purbachal nung Rajuk New Town Project dak sendakba ochimashi ken o balaka nung küm 21 tepuokdak

ayutsü obendang agüja lir.

Küm tenet ya tanen makai tepuokdak ayutsü shia lir.

Taoba mapang obendang agütsüsang Judge Mohammad Abdullah Al Mamun-i ashiba agi, item ken o tiyong sür aliba ali ya Sheikh Hasina nem application makai agütsü aser ozüing agi melaba jurisdiction dak alia lir.

Hasina ya ken o shia senchi sen Tk 1 lakh chia lir aser senchi memonok nungbo ano tepuokdak mapang tali ayutsü.

November 27 ken o nung Hasina'er jabaso Sajeeb Wajed Joy aser jala Saima Wazed Putul nungeria küm pongu-ngu tepuokdak ayutsü temerenshi agütsü.

Anti-Corruption Commission ajanga January ita ken o trok benok aser March ita charge-sheets agüja liasü.

Taoba küm longkak aitba mapang nisung meimchir anema mapa tamajung inyakba asoshi November 27 atongtsü anogo 10 lia ano tribunal kati taoba ato kilonser tasüba agi merenshitsü obendang agüja liasü, saka item ajak ya yimten tsütsü nungi tenük yokba lir ta lai ashir.

Bangladesh indang interim government-i India dang Hasina yoktsü maneni mepishir. India-ia iba temepishiba asadangtar ta shia lir.

Ukraine ken o junga jembir, saka ano mapa tali nüngdaker: Rubio

Miami, Luchii/December 01 (Agencies): Russia-Ukraine rara tembangtsü asoshi tezüingzüktep agütsü atema Ukraine den jembishinü junga katar, saka mapa ano tali inyaksü nüngdaker, ta US Secretary of State Marco Rubio-i ashir.

Florida nung iba jembishinü nung national security council secretary Rustem Umerov-i anir Ukraine ketdangsürtem dena liasü.

Senden nung Tir Donald Trump indang envoy Steve Witkoff aser Trump jala kinungbo Jared Kushner dena liasü. Witkoff ya Russia tsütsü jembishinü akatsü atema Hombarnü Moscow-i aotsü imlar, koba Mongulbarnü agütsü ta Russia-i ashir.

Ukraine tir indang top negotiator Andriy Yermak'er kidang 'anti-cprruption raid' ka aoba sülen pa anener pa melen Umerov ya shima liasü.

Russia aser Ukraine tsüingta küm pezü jungnüa rara anentsü atema hopta ana mazüingi jembishinü akaba nung Deobarnü senden ya mera tesüsaba alitsü.

"Ibai rara anentsüba atema kisüing masü. Ibai Ukraine mapang talangka yimchi-

yimjung nung alitsü asoshi lir. Aser tanü onoki aji yangluogo, saka ano mapa teinyaksü tali lir," ta Rubio-i Miami north len Hallandale Beach nungi ashir.

Russia den yimjung atema jembishinüba nükjidong ya Ukraine "sovereign, independent aser yimchiyimjunga" yutsütsü atema lir ta pai Ukraine ketdangsürtem dang ashir.

Deobarnü senden tenzükdang, "Onoki Ukraine tarutsü indang jembir, Ukraine security indang, tanaben Ukraine dak tashiyim meinyaksü atema, Ukraine yimchiyimjung atema, Ukraine tanaben yanglutsü atema," ta Umerov-i shia liasü.

"US-i onok ola angashir. US-i onok yarir. US onok den külemi inyaker," ta pai English nung ashir.

Deobarnü Air Force One nung osangbener den jembidang, jembishinü kanga junga otar aser rara anentsü atema tezüingzüktep agütsü lenmang junga lir, ta Trump-i ashir.

Tir Vladimir Putin den yimjung sentong indang jembitsü atema Moscow-i tan hopta Witkoff aser Kushner yoktsü, ta Trump-i shia lir.

Israel nungertemi Netanyahu anema Tel Aviv nung longkak ait



Tel Aviv, Luchii/December 1 (Agencies): Ochi mashi ken o nung aitsür aliba ajak atema tatok agütsütsü Ato Kilonser Benjamin Netanyahu-i mepeshiba sülen Israel nungertemi Tel Aviv nung Tir Isaac Herzog'er kima longkak aita liasü.

Arishi küm 76 tain Netanyahu-i, pai aibelenba kecha menangzüki mesüra aibelen asoshi sasaba kecha melemsatepi pa anema ken o benoka alibatem tai adoktsü atema tir dang mepeshiba sülen nüburtemi Deobarn aonung longkak aita liasü.

Naama Lazimi densema opposition MP temi activist, longkak aitertem den iba sentong nung shilem agia liasü. "Pardon = Banana Republic"

yimyim dak ajemdaker parnoki longkak ait aser pai mepeshiba ya magizüktsü takhangba agüja liasü.

Longkak aiter kati Netanyahu ama renemer tepuokdak asema orange jumpsuit ka semer liasü aser tangartem somomo aika bendena yur aliba nung mener longkak aita liasü.

"Pai khuret kecha mebenei aser linük raksatsüba atema taah kecha magütsüi pa anema ken o benoker aliba ajunga agintsü asüingdanger," ta nüngtugu antigovernment activist Shikma Bressler-i ashir.

"Israel nungertemi ken o kanga junga angateter aser iba ya linük tarutsü lir," ta lai shisem. Netanyahu ya linük nung Ato Kilonser mapa talangtiba

inyakba PM lir, aser pa ken o asem nung aija küm pongu tashi obendang arudar. Pa ya sübokrem agiba, ochi mashi ken o aser tamang makateti akümba atema aitsür lir.

Ken o ka nung Netanyahu aser pa kinungtsü Sara nati USD million 260,000 dak tema alang cigar, jewellery aser champagne amala sen tasak jenjang osettem yimden yimsüsüba tsütsü maongka balala agütsütsü atema billionaires tem ket nungi agiba atema aitsür lir. Maneni pa ya Israeli media outlets ana den pa pusema osangtem sangdongtsü atema inyakteptsü merangba atema-a aitsür lir.

Netanyahu-i item taitsübatem magizük aser pa okatsüri ashiba agi, tir office dangi tapak 111 nung zülur yokba shiti nung Ato Kilonseri legal inyakyim ajanga pa medentsü ta tamang akaba lemsatepogo.

Video osang tatsüka ka ajanga Netanyahu-i ashiba agi, pai inyakyim tembanga odaktsüner, saka security aser yimden yimsüsüba dak sendakba nung linük mepetmesü nung lir asüba agi pai iba ya benok.

"Ken o maneni obendangba ajanga telung nung asenok shisatsüdar aser telemdang adokdaksür," ta pai shisem.

Herzog indang office

sangdong ka ajanga parnoki Netanyahu temepeshiba agizükogo, ta ashir.

"Iba ya temepeshiba balaka lir. Ken o kanga junga angadangba sülen tiri iba temepeshiba ya khuret angateta aser nendak nendaka asadangtsü," ta office sangdong ajanga metetdaksü.

Linük nung taitsüba balala benoker aliba den bendenloksema Netanyahu ya Hague nung amendaker aliba International Criminal Court (ICC)-ia aitsür lir. 2024 küm November ita ICC-i Netanyahu aser taoba Defence Minister Yoav Gallant na aputsü tetuyuba agütsü. Gaza nung rara mapang aibelenba aser meimchir temeden anema inyaksangshiba atema tena ya aija liasü.

Israel-i Gaza amak tenzükba sülen nisung 70,000 dak tema tepsetogo. Aüsrtem ya timba tetsür aser tanurtem liasü. Iba rara nungsa nisung 171,000 shi yiruogo.

United States Tir Donald Trump-i Netanyahu nem tatok agütsütsü atema Israel dang mepeshiba sülen hopta ishika lir Netanyahu-i pa dang tai atoktsü mepeshia asüingdangogo. Taoba ita Israel indang parliament nung o jembiba mapang Trump-i Herzog tsütsü shir Netanyahu nem tatoktsü agütsütsü mepeshia liasü.

Iba ita tetenzüklen Trump-isa, Herzog dangi shiti ka yokogo aser ochi mashi ken o ya "political, unjustified prosecution" ta shiogo.

Israel nung temzüing ozüing dak ajemdaker ken o tembanga inyakba aser aibelenba aliri aibelenba sangdongba sülenang taitok agütsür. Netanyahu-i iba temepeshiba agütsüba ajanga aikati pa aitsüdar.

Opposition lenir Yair Lapid-i ashiba agi, aibelenba menangzüki tashi, aibelenba atema sasaba melemsatepi tashi aser tangsa tang yimden yimsüsüba metoktsü tashi Netanyahu nem tatok magütsütsüla.

Opposition yimden yimsüsüer Yair Golan-ia, ato kilonser dang mapa nungi anentsü ayongzükbä den tir dang pa nem taitok magütsütsü mepeshia metetdaksüogo.

"Aibelenba aliri dang taitok meshir," ta Golan-i ashir.

Movement for Quality Government in Israel-i ashiba agi, aija aliba PM ka nem taitok agütsüba ajanga temzüing ozüing tema nung lisopurtem lir ta osang tejangja ka agütsür.

Herzog'er kima longka aiter Ami Dror-i ashiba agi, tir mapaji Israel indang democracy kümzüka ayutsü atema lir, aser nai temzüing ozüing raksatsüra iba ya Israel democracy tatembang ka asütsü.

Duplantis & Levrone na nem 'Athletes Of The Year' naroküm agütsü



Luchii/December 1, 2025 (Agencies): Sweden nunger nüngtugu pole vault asayar Armand 'Mondo' Duplantis aser US tsür asemteper Sydney McLaughlin-Levrone na nem Deobarnü Monaco nung World Athletics-i athletes of the year naroküm agütsüogo.

Arishi küm 26 tain Duplantis-i 2025 küm pole vault record pezü yanglu aser indoors aser outdoors naprongla nung world title bena liasü. Pa asayamung 16 nung khen danga tamakok mongui lir aser pa ya modern history nung tebur pole vault asayartem rongnung küm ana khen danga tamakok mongui asayaba mezüngbuba asayar kümogo.

Duplantis-i Tokyo nung world championships asayaba mapang 6.30 metres alemteta pa indang career nung world record 14benbuba yanglu aser iba asayamung title bena liasü.

2020 aser 2022 küm iba naroküm agizükba sülen

Duplantis-i tang agi tasembenbuba iba naroküm agizükogo.

Kasa mapang nung McLaughlin-Levrone-i alizüng takaratiba tongtetertem rongnung tanabula kuma world 400m title bena liasü. Lai championship record yanglu aser taoba mapang East Germany nungi Marita Koch-i record yanglur aliba tera agi dang majateti liasü. La ya Olympic nung anaben tashi 400m hurdles champion lir, aser 1985 küm sülen la ya tetsürtem rognungi 400m second 48 nung asemteba mezüngbuba asayar aküm. Laisa, 4x400m relay koka liasü.

Tokyo nung lai alizüng 47.78 seconds nung tongtet koba Koch-i 47.60 seconds nung alizüng tongteter aliba sülen tanabuba nung lir.

Arishi küm 26 tain McLaughlin-Levrone ya 400m mesüra 400m hurdles nung küm anabuba khen danga tamakok

ngua mali. La ya asaya anaprongla nung world titles abenba mezüngbuba asayar lir. Lai 2022 kuma iba naroküm nguogo.

Kenya nunger Emmanuel Wanyonyib nem men's track award agütsü. Pai Olympic nung gold anguba den 800m world title dena benogo. Tetsürtem rongnung iba naroküm McLaughlin-Levrone nem agütsü.

Australia nunger Nicola Olyslagers nem field athlete of the year naroküm agütsü. Pai indoors aser outdoors naprongla nung high jump title bena liasü.

Kenya nunger long-distance runner Sebastian Sawe nem men's out-of-stadium award agütsü. Pai London aser Berlin marathon koka liasü.

Kasa mapang nung Spain tsür racewalker Maria Perez nem women's out-of-stadium award agütsü. Lai 20km aser 35km walks nung world title benogo.

Russell IPL asaya nungi anisüngzüker: KKR nung shilem tasen agütsü



Luchii/December 1, 2025 (Agencies): Kolkata Knight Riders nungi nüngtugu allrounder Andre Russell-i pa Indian Premier League asaya nungi anisüngzüker sangdongogo. Arishi küm 37 tain asayar ya 2026 season nungi KKR indang "Power Coach" tasenba asütsü.

Russell-i Instagram ajanga iba osang sangdonga liasü. "Ni

IPL asaya nungi anentsü atema telemteba agiogo. Ni linük balala nung league balala nung maneni tanga KKR franchise tem nungi asayatsü," ta pai zülutsü.

Paisa, IPL asayaba menongra bilemtetba lemsatepogo, kong six trok azüba, team takok dangi ania asayaba aser MVP award tem anguba densema lir, koba ajanga pa ya alima nung ajaki tsübuba T20 asayar ka kümdaktsü.

Pa asaya nungi anenba mapang indang jembidang Russell-i, "ni rameia moner. Ni legacy ka toktsüner. Fan temi na küm ishika tejakdang asaya nungi anentsü asü ta ashitsü melenana kechiba asaya nungi anener ta asüngdangba mapang asaya nungi anenba tajungba lir," ta ashi.

Kasa mapang nung Russell-isa, pa nongita yariba atema KKR indang management dang kanga pelaba lemsatepa liasü. "Venky Mysore küna aser Shah

Rukh Khan dena aiben sensakemogo. Parnoki kü dang temeim aser akümstübu sayuogo aser ni ground nung kechisa inyaktetogo item ajak asoshi tenüsangogo," ta pai ashi.

KKR indang Power Coach ama lanur asayartem den pa tajangshiba aser tashi lemsateptsü Russell sentong lir.

"Ni kodang 'Power Coach' nüngja ya angashi iba yagi Andre Russell kanga junga rasar ta ni bilem, kechiyong ni batting amenba mapang kü power, ground nung ball amer ni sayuba tashi yagi ni department mashi ka nung teyari agütsütettsü," ta pai ashi.

IPL nung asayaba mapang Russell-i 2014 aser 2024 küm KKR nungi iba asayamung kokogo, pai six 223 azük, Player-of-the-Match awards 16ben agizük aser 2019 IPL Player of the Tournament naroküm agizüka liasü. Pa asaya 139 nung asayaogo.

India U17 team AFC Asia Cup 2026 atema qualify süogo

Luchii/December 1, 2025 (Agencies): Deobarnü India team-i Iran koka AFC U17 Asia Cup 2026 atema qualify süogo. Iba asayamung ya Saudi Arabia nung asayatsü.

Ahmedabad kübok EKA Arena nung Group D asaya tatembangbuba nung India team-i goal 2-1 agi Iran madak takok ngua liasü.

Asaya nung Amireza Valipour-i Iran atema mezüngbuba goal idaktsü, saka India team nungi asayar Dallalmuon Gangte aser Gunleiba Wangkheirakpam nati goal kaka idakja parnok asaya koka liasü.

Group D nung Iran team khen danga tamakok mongui point tenet ngur lia parnok iba asaya asaya aser draw dang asütsü nüngdaka liasü. Kasa mapang nung India team bo AFC U17 Asia Cup atema

qualify asütsü asoshi iba asaya kechi südir süaka asaya akoktsü nüngdaka liasü.

Iba asaya akokba sülen India team-a point tenet kuma Iran den kasasa aküm, saka head-to-head nung parnok tejakdang aküm aser iba asayamung atema qualify süteta liasü.

Asaya nung Valipour-i minute 19buba nung Iran atema mezüngbuba goal idaktsü, ajisüaka India nunger asayartemi kanga meranga asayar Gangte-i asaya mezüngbuba shilem tembangtsü lia goal ka idakja goal kasasa aküm.

Asaya tanabuba shilem nung India team-i tetenzük nungi goal idaktsütsü meranga asaya aser minute tenet tsüngda Wangkheirakpam-i goal ka idakja parnok tejakdang aküm aser goal ana yagi asaya koka liasü.

Yamal-i Morocco melena Spain nungi asayatsü shimba indang jembid



Luchii/December 1, 2025 (Agencies): Barcelona nungi nüngtugu lanur asayar Lamine Yamal-i, international jenjang nung Morocco melena Spain nungi asayatsü telemteba agiba indang lemsatepogo. Pai, FIFA World Cup dena tongtibang asayamungtem koknuba agi iba telemteba agi, ta ashi.

Yamal shiba Spain nung soa intet, pa Morocco nungi jakzüker asayar ka lir aser pa iba Africa linük nungi asayatsü temsüa lir, saka pai Spain nungi asayatsü shimogo.

"Temulung taroktiba nung ni Morocco nungi asayatsü bilema liasü. Iba mapang Morocco World Cup semi-finals atong..." "Saka telemteba agütsü mapang nungbo kü tebilemba tejangja liasü. Ni Morocco meimer aser akümstübu saka ni EURO aser Europe nung asayaner."

"European football ya nüburtemi terprangba aser international jenjang den sütepa lir ta bilemer."

"Ni iba jenjang agi aser ni

World Cup akoktsü anasatibai anirogo aser iba atema Tsüngrem tenüng asanger. Ni Morocco teti meimtsü kechiyong iba ya kü linük lir, aser ni Spain nung intet aser iba ya-a kü linük ama bilemer," ta pai ashi.

Barcelona nungi asaya tenzükerba sülen Yamal ya alima nung asayar tajungtiba ka kümogo aser taoba küm Hansi Flick lenisüba nung par team-i La Liga title abenba nung pai teyari agütsü. Paisa, Euro 2024 akokba mapang Spain nem teyari tulu agütsü.

Ground tema nung Yamal libaliro ya aikati ashishia arudar aser pa taküm groin-a yirua liasü. Ajisüaka ground telung nung pa asayaba yimya ya kecha tashishitsü mali.

Barcelona pur küm ka sülen Camp Nou nung asaya tenzükerba mapang pa tanaben asaya tenzükerba liasü. Honibarnü Alaves pur goal 3-1 agi akokba asaya nung Yamal-ia goal ka idaktsü aser parnok tang La Liga nung temaba jenjang nung lir.

BILEMDANGANG

"Azümesener asoshi mapa ajak tamakoktsü dang."